



KEMENTERIAN PEMBANGUNAN WANITA,  
KELUARGA DAN MASYARAKAT

**TEKS UCAPAN**  
**YB DATUK SERI RINA MOHD HARUN**  
**MENTERI PEMBANGUNAN WANITA, KELUARGA DAN MASYARAKAT**

**PROGRAM**  
**MAJLIS PENYAMPAIAN BANTUAN KEWANGAN PENGOPERASIAN**  
**TAHUNAN DAN PENUBUHAN PUSAT AKTIVITI WARGA EMAS (PAWE)**  
**BAHARU NEGERI PERAK TAHUN 2021**

**LOKASI / TARIKH / MASA**  
**HOTEL KINTA RIVERFRONT, IPOH PERAK**  
**13 MAC 2021**  
**11:00 PAGI**

## **PENDAHULUAN**



Assalamualaikum Warahmatullahi Wabarakatuh.  
Salam Sejahtera,  
Salam Malaysia Prihatin

## **SALUTASI**

(dilampirkan)

## KATA-KATA ALUAN

- (1) Alhamdulillah, marilah kita bersama-sama memanjatkan setinggi-tinggi kesyukuran kehadiran Allah Subhanahu Wata'ala kerana dengan limpah kurnia dan keizinanNya dapat kita semua hadir ke **MAJLIS PENYAMPAIAN BANTUAN KEWANGAN PENGOPERASIAN TAHUNAN DAN PENUBUHAN PUSAT AKTIVITI WARGA EMAS (PAWE) BAHARU NEGERI PERAK TAHUN 2021** pada pagi ini.
- (2) Di kesempatan ini saya ingin merakamkan setinggi-tinggi penghargaan dan ucapan terima kasih kepada Jabatan Kebajikan Masyarakat (JKM) khususnya Pengarah Kebajikan Masyarakat Negeri Perak yang menjemput saya ke majlis ini.
- (3) Tidak lupa juga ucapan terima kasih dan saya mengalu-alukan kehadiran semua tetamu khususnya **Pengerusi PAWE dan kesemua warga emas yang kita raikan pada pagi ini.**

Tuan-Tuan dan Puan-puan yang saya kasihi,

## TAKRIFAN WARGA EMAS

- (4) Unjuran data daripada Jabatan Perangkaan Malaysia menunjukkan negara kita akan **mencapai status negara tua atau *aged nation*** menjelang **tahun 2030** apabila dijangkakan **15.3 peratus** daripada **jumlah keseluruhan penduduk adalah berusia 60 tahun dan ke atas**.
- (5) Ini bermakna populasi warga emas di Malaysia pada ketika itu akan menjangkau **5.8 juta orang berbanding 38.1 juta** jumlah penduduk di negara kita.
- (6) Kementerian Pembangunan Wanita, Keluarga dan Masyarakat (KPWKM) telah merancang dan melaksanakan pelbagai inisiatif dan program dalam usaha memelihara dan menambahbaik kesejahteraan warga emas, keluarga serta komuniti terutama dalam persediaan negara ke arah menjadi negara tua pada 2030.

- (7) Inilah yang dizahirkan oleh kepimpinan unggul negara ini iaitu **YAB Perdana Menteri Malaysia yang kita kasihi, yang begitu kuat bekerja dan berjuang demi kesejahteraan rakyat** biarpun berada di usia emas.

Tuan-tuan dan Puan-puan,

**PELUASAN PAWE BAHARU BAGI PENYEDIAAN INFRASTRUKTUR DAN KEMUDAHAN KEPADA WARGA EMAS**

- (8) Kesejahteraan sosial dan pembangunan yang dinikmati oleh rakyat Malaysia pada masa ini adalah hasil titik peluh dan usaha gigih generasi terdahulu yang kini akan atau telah menjadi warga emas.
- (9) Sehubungan itu, adalah menjadi obligasi sosial dan komitmen Kerajaan untuk menyediakan **infrastruktur dan kemudahan** kepada warga emas **selaras dengan Rancangan Malaysia Ke Sebelas (RMK11)**.

- (10) **Komitmen ini di teruskan melalui Rancangan Malaysia Ke Dua Belas (RMK12)** dengan matlamat untuk **meningkatkan kualiti hidup warga emas** melalui **penyediaan ekosistem dan infrastruktur mesra warga emas** serta menambah baik kualiti perkhidmatan penjagaan warga emas.
- (11) Adalah penting bagi warga emas untuk terus kekal aktif dan produktif. Untuk itu, penubuhan PAWE merupakan salah satu tindakan proaktif Kementerian dalam menyediakan perkhidmatan secara terus kepada warga emas di peringkat komuniti.
- (12) Ini adalah antara inisiatif Kerajaan dalam memastikan agenda ke arah **penuaan sihat, aktif dan produktif** terus dilaksanakan (***Successful Ageing***).

(13) Program-program dan aktiviti-aktiviti di PAWE yang digerakkan dengan penglibatan komuniti setempat, dan kerjasama pelbagai agensi kerajaan dan Pertubuhan Sukarela Kebajikan, dilaksanakan berpandukan **lima (5) dimensi** yang berkaitan **dengan Dasar Warga Emas Negara (DWEN)** seperti berikut:

- i. **Penuaan Sihat** – Program Kesihatan;
- ii. **Penuaan Aktif** – Program Rekreasi dan sukan;
- iii. **Penuaan Positif** - Program Kerohanian dan Pembelajaran Sepanjang Hayat;
- iv. **Penuaan Produktif** – Program Pemerkasaan ekonomi; dan
- v. **Penuaan Menyokong** – Program khidmat sokongan kepada warga emas/ kesukarelawan.

(14) Dengan adanya program-program sebegini, ia dapat memberi ruang dan peluang kepada warga emas yang masih aktif dan produktif untuk terus berada dalam komuniti dan mereka boleh terus menyumbang pengalaman dan pengetahuan kepada masyarakat.

(15) Sehingga kini terdapat sebanyak **143 buah PAWE** meliputi **131 kawasan parlimen** di seluruh negara telah ditubuhkan dan beroperasi dengan **ahli berdaftar seramai 47,627 orang** terdiri daripada **pelbagai bangsa dan kaum**. Kerajaan mensasarkan **menjelang 2030, sebanyak 222 buah PAWE dapat ditubuhkan**.

Sasarannya ialah **1 PAWE bagi 1 Parlimen**.

(16) Bagi tujuan tersebut, Kerajaan telah memperuntukan sebanyak **RM17 juta bagi penubuhan PAWE baharu mulai tahun 2018 hingga 2023 di bawah Rancangan Malaysia Ke - 11 (RMK 11)**.

(17) Pada **tahun 2020**, walaupun dengan cabaran wabak COVID-19 yang melanda Negara kita, JKM telah berjaya menubuhkan sebanyak **11 PAWE baharu** termasuk **2 penubuhan PAWE baharu di Negeri Perak iaitu PAWE Bagan Datuk dan PAWE Langkap**.

(18) Manakala pada tahun ini, JKM telah diperuntukan sebanyak **RM 2 juta bagi penubuhan 20 buah PAWE baharu**.



## **PERUNTUKAN PENGOPERASIAN PAWE**

**Tuan-tuan dan Puan-puan yang saya kasihi sekalian,**

- (19) Melalui Belanjawan 2021 yang telah diluluskan di Dewan Rakyat, **DENGAN TEMA: TEGUH KITA, MENANG BERSAMA**, Kerajaan telah menaikkan bantuan kewangan tahunan pengendalian **Pusat Aktiviti Warga Emas (PAWE)** yang dikendalikan oleh NGO daripada **RM33,330 kepada RM50,000.**
- (20) Ini adalah salah satu bukti komitmen dan keprihatinan Kerajaan khususnya dalam menambahbaik perkhidmatan kepada golongan **sasar yang memerlukan.** Peningkatan ini memerangkumi **pertambahan kepada peruntukan program dan aktiviti PAWE** serta **kenaikan elaun sukarela, penyelia dan pembantu penyelia** dengan mengambil kira gaji minimum yang telah dikuatkuasakan.

- (21) Kenaikan ini dilaksanakan bagi mendayaupayakan NGO dan komuniti serta memperkasakan PAWE sebagai hab perkhidmatan kepada warga emas bagi persediaan ke arah Negara Tua 2030.
- (22) **Sebanyak RM7.15 juta telah diperuntukkan pada tahun 2021 ini bagi tujuan kelangsungan operasi 143 PAWE sedia ada.**
- (23) Sehubungan itu, bagi warga emas di negeri Perak, untuk memastikan PAWE di Negeri Perak terus aktif dan produktif, saya **dengan ini juga mengumumkan bahawa KPWKM melalui JKM akan menyalurkan peruntukan berjumlah RM350,000.00 kepada 7 buah PAWE di Negeri Perak bagi tahun 2021.**
- (24) **Adalah diharapkan melalui bantuan ini akan memastikan kelestarian operasi PAWE di Negeri Perak untuk terus aktif dan produktif.**

- (25) **Manakala bagi penubuhan PAWE baharu, JKM juga telah meluluskan penubuhan sebuah PAWE baharu di Negeri Perak, iaitu di Parlimen Kuala Kangsar dan peruntukan penubuhan berjumlah RM100,000.00 bagi kerja-kerja pembaikan dan pembelian peralatan juga akan disalurkan kepada JKMN Perak.**
- (26) **Oleh yang demikian, dengan penambahan bilangan PAWE baharu tersebut menjadikan jumlah keseluruhan PAWE di Perak berjumlah 8 buah PAWE dan JKM sedang mempertimbangkan lagi beberapa permohonan baharu dari Negeri Perak bagi tahun ini.**

## **INISIATIF KEBAJIKAN DAN PEMERKASAAN WARGA EMAS OLEH KEMENTERIAN PEMBANGUNAN WANITA, KELUARGA DAN MASYARAKAT (KPWKM)**

(27) Menyedari pentingnya mengekalkan warga emas untuk terus produktif, berdaya saing dan sejahtera, KPWKM juga telah merangka dan sedang melaksanakan pelbagai inisiatif seperti berikut :

### **Pertama, Modul Penjagaan Warga Emas (NOSS)**

Modul ini dibangunkan bagi meningkatkan kualiti penjagaan warga emas. JKM telah dilantik oleh Pihak Jabatan Kemahiran Malaysia (JPK) sebagai Badan Peneraju Industri bagi sektor penjagaan dan perkhidmatan komuniti termasuk bidang penjagaan warga emas.

JKM juga menggalakkan penjaga di pusat jagaan untuk mendapat Sijil Kemahiran Malaysia (SKM) dalam penjagaan warga emas ini.

## **Kedua, Program Imunisasi COVID-19**

Kerajaan juga telah melaksanakan fasa pertama Program Imunisasi **Covid-19 Kebangsaan pada 24 Februari 2021** kepada petugas barisan hadapan.

Manakala bagi **fasa kedua yang akan bermula pada April**, program ini akan **melibatkan kategori warga emas, pesakit penyakit kronik dan orang kurang upaya (OKU)**. KPWKM sedang bekerjasama rapat bersama Kementerian Sains, Teknologi & Inovasi (MOSTI) dan Kementerian Kesihatan Malaysia (KKM) bagi menyelaraskan pemberian vaksin kepada Warga Emas khususnya yang berada di pusat jagaan atau pusat aktiviti di bawah kelolaan JKM.

Susulan itu, KKM bersetuju melaksanakan imunisasi COVID-19 bermula di **Institusi Kebajikan Warga Emas** yang melibatkan **2,330 orang** sebagai usaha untuk mencegah penularan Covid-19 di insituti warga emas.

**Seterusnya JKM sedang mengumpulkan data keahlian PAWE bagi Program Imunisasi Covid-19 Kebangsaan bagi sasaran warga emas di komuniti yang dijangkakan seramai lebih 47,000 warga emas di PAWE dapat menyertai program ini. Saya menyeru kepada semua rakyat terutamanya warga emas supaya mendaftar untuk menyertai program imunisasi ini melalui saluran yang disediakan.**

Tuan-tuan dan puan-puan boleh **mendaftar untuk program vaksinasi COVID-19 ini melalui aplikasi MySejahtera, laman web** yang disediakan Jawatan Kuasa Khas Jaminan Akses Bekalan Vaksin COVID-19 (JKJAV) atau menghubungi talian hotline 1-800-888-828.

### **Ketiga, Kajian bagi Membentuk Model Penjagaan Jangka Panjang yang Bersepadu dan Mampan di Malaysia**

KPWKM juga prihatin terhadap pelbagai isu-isu spesifik yang dihadapi dalam aspek penjagaan warga emas. Kementerian kini dalam proses meneliti model-model penjagaan jangka panjang sedia ada dan akan menambah baik model tersebut bagi memastikan kesejahteraan warga emas dapat dicapai.

### **Keempat, Projek Bandar Mesra Usia (*Age Friendly City*)**

KPWKM dengan kerjasama **Unit Perancang Ekonomi (EPU)** dan ***United Nations Development Programme (UNDP)*** sedang melaksanakan projek rintis **Bandar Mesra Usia** atau dikenali sebagai ***Age Friendly City*** di Taiping, Perak.

Menerusi projek ini, Kementerian akan membangunkan rangka tindakan yang boleh digunakan oleh pihak berkuasa tempatan dalam menyediakan atau menambah baik kemudahan bagi menjadikan sesebuah kawasan atau bandar yang mesra kepada semua peringkat usia termasuk kepada warga emas.

Untuk makluman tuan-tuan dan puan-puan yang saya hormati sekalian, **Negeri Perak mempunyai peratusan penduduk warga emas tertinggi di Malaysia iaitu 15.8%**. Peratusan ini mewakili **397,400 orang Warga Emas** berbanding **keseluruhan penduduk negeri Perak**.



## **Kelima, Sistem Warga Emas Nasional**

**KPWKM sedang membangunkan Sistem Warga Emas Nasional (Sistem e-WEN) bagi memenuhi keperluan untuk mempunyai sistem maklumat dan data bersepadu berkaitan warga emas, Sistem ini dirancang untuk berfungsi bagi tujuan pendaftaran warga emas, suai padan pekerjaan dan perkongsian maklumat, khusus bagi menghasilkan pemetaan warga emas di negara ini pada masa hadapan.**

Orang awam khususnya warga emas juga boleh menggunakan sistem ini untuk mendaftar sebagai ahli PAWE.

**Dan**

## **Keenam, Bantuan Orang Tua (BOT)**

**Bagi warga emas yang miskin dan memerlukan, Kerajaan telah menaikkan Bantuan Orang Tua (BOT) daripada RM350 sebulan kepada RM500 sebulan.**

**Bagi Negeri Perak, kenaikan ini akan memberi manfaat kepada 10,118 penerima bantuan warga emas dengan anggaran kos setahun berjumlah RM 87 juta.**

Kesemua inisiatif yang saya sebutkan tadi dirangka dan dilaksanakan khusus untuk memelihara kesejahteraan dan menambahbaik kualiti hidup warga emas di Malaysia.

Kerajaan khususnya KPWKM, amat mengambil berat dan prihatin terhadap keperluan rakyat, dan akan sentiasa berusaha memenuhi ekspektasi semua pihak yang berkepentingan bagi memastikan penyampaian perkhidmatan kepada rakyat lebih berkesan dan benar-benar sampai kepada kumpulan sasaran.

## **PENUTUP**

**Tuan-tuan dan puan-puan yang dihormati sekalian,**

- (28) Kesedaran mengenai penuaan perlu diterapkan daripada peringkat awal sebagai persediaan menghadapi usia tua. Pelbagai aspek perlu diambil kira khususnya aspek emosi, kewangan, kesihatan, persekitaran, persediaan minda dan sebagainya.

Kesemua pihak di pelbagai peringkat mestilah memainkan peranan masing-masing untuk mengambil kira kepentingan warga emas di dalam setiap perancangan yang dibuat.

- (29) Sistem sokongan yang utuh perlu disediakan tidak kiralah daripada sudut penyediaan infrastruktur atau pun sokongan sosial di peringkat keluarga, komuniti atau masyarakat di seluruh negara.

Kerjasama erat daripada pihak media, komuniti dan Badan bukan Kerajaan (NGO) amat diperlukan sistem sokongan yang efektif dapat

diwujudkan untuk kesejahteraan semua pihak di pelbagai peringkat umur, khususnya Warga Emas.

- (30) Adalah menjadi harapan KPWKM untuk meningkat fungsi PAWE sebagai pusat komuniti yang unggul bukan sahaja dapat memberi manfaat yang optimum kepada warga emas, tetapi juga merupakan satu pusat komuniti setempat yang dapat memberi manfaat, menyumbangkan kepakaran kepada komuniti serta dapat memupuk amalan gaya hidup sihat di kalangan masyarakat.
- (31) Akhir kata, saya ingin merakamkan ucapan tahniah dan terima kasih kepada Jabatan Kebajikan Masyarakat Malaysia, Jabatan Kebajikan Masyarakat Perak, Pengerusi PAWE dan NGO dan semua warga emas yang menyumbang sama ada secara langsung atau tidak langsung dalam menjayakan majlis ini.
- (32) Warga emas merupakan aset yang amat penting kepada negara kerana ilmu, pengalaman dan kepakaran yang dimiliki mereka tidak boleh dicari ganti.

(33) Kepada pengendali-pengendali PAWE yang akan menerima peruntukan pada hari ini, tahniah dan terima kasih atas usaha keras anda memastikan Pusat Aktiviti Warga Emas ini sentiasa beroperasi dengan baik. Pesan saya, uruskanlah PAWE-PAWE ini dengan penuh bertanggungjawab.

Carilah ruang dan peluang untuk menambahbaik program-program atau aktiviti-aktiviti yang dilaksanakan di PAWE supaya kekal relevan dan bersesuaian dengan situasi semasa. Saya percaya anda semua mampu melakukannya.

**Tuan-tuan dan puan-puan yang saya hormati sekalian,**

Dengan lafaz Bismillahirrahmanirrahim saya dengan rasa penuh kesyukuran merasmikan **MAJLIS PENYAMPAIAN BANTUAN KEWANGAN PENGOPERASIAN TAHUNAN DAN PENUBUHAN PUSAT AKTIVITI WARGA EMAS (PAWE) BAHARU NEGERI PERAK TAHUN 2021**

Sekian,

Wabillahitaufiq Walhidayah  
Wassalammualaikum Warahmatullahi  
Wabarakatuh.

**YB DATUK SERI RINA MOHD HARUN**  
**MENTERI PEMBANGUNAN WANITA, KELUARGA DAN MASYARAKAT**  
**13 MAC 2021**